



UYG'ONGAN YURT SADOSI

TOSHKENT VILOYATIDA SURAT VA SIYRAT YANGILANISHLARI

Uyg'ongan yurt sadosi... Toshkent viloyati haqida gap ketganda, ko'nglimizdan ana shu fikr o'tadi. Bu bejiz emas, albatta. Bugun viloyat shunchaki poytaxtga yaqin hudud emas, balki amalga oshirilayotgan islohotlar va erishilayotgan natijalar bilan yangi O'zbekistonning jonli timsoliga aylanmoqda.

2021-yil 18-19-mart kunlari Prezidentimiz Shavkat Mirziyoyevning Toshkent viloyatiga tashrifi nafaqat rasmiy voqelik, balki butun viloyat taqdiri uchun tarixiy burilish nuqtasi bo'lgan edi. Davlatimiz rahbari tashrif chog'ida xalq ichiga kirib, tuman va shaharlar ijtimoiy-iqtisodiy hayotidagi “o'sish nuqtalari”ni amaliy kuzatuv va muloqotlar yo'li bilan topishga bel bog'ladi. Yurtboshimizning jurnalistlar bilan suhbatda aytgan so'zlari yana ham ko'proq ma'no kasb etadi: **“Mening eng katta maqsadim – har bir tumanning “o'sish nuqtasi”ni topish... Toshkentda kabinetda o'tirib emas, pastda yurib, buni amalga oshirish...”** Bu xizmatxonasida tuzilgan rejalaridan hayot girdobiga tushib ishlash, sukunatda qolgan muammolarni xalq ovozi orqali eshitish, chin ma'noda, xalq ichida bo'lish siyosatining davomli ko'rinishlari edi.

Tan olish kerakki, Prezidentimiz maqsad qilgan “o'sish nuqtalari” topildi. Ko'p emas, oradan to'rt yildan ko'proq vaqt o'tdi. Bugun esa kechagi maqsadlar amaldagi ulkan o'zgarishlarga aylangani, “o'sish nuqtalari” endi faqat xaritada emas, balki viloyatning iqtisodiy va ijtimoiy tuzilmasida real manzara kasb etayotganini ko'ryapmiz.





Ko'z o'ngimizdagi o'zgarishlar

O'zini topa olgan hudud

Har bir hududning, u yerdagi yurtdoshlarimizning ming yillardan buyon shakllanib kelayotgan yashash tarzi, o'zligini namoyon qilish shamoyili mavjud. Mamlakatimiz hududlari nafaqat tabiiy geografik joylashuvi, balki bu yerda yashayotgan insonlarning ma'naviy qiyofasi nuqtayi nazaridan ham farq qiladi. Ba'zi hududlar borki, ularning taraqqiyoti doim ochiq sahnada kechadi, har bir yutug'i shov-shuvga sabab bo'ladi. Ammo ba'zi hududlar borki, ular sabr bilan yashaydi, ichki jasoratini sokinlikda, yurakda saqlaydi. Toshkent viloyati ana shunday yurtlardan: u uzoq yillar davomida “poytaxtga yaqinlik” degan nomda yurgan, ammo botinida tinimsiz qo'zg'alish, o'zini namoyon etishga nisbatan kuchli salohiyatni yashirib keldi.

Bugun esa bu diyor islohotlar markazida. Avvalgi yillarda ishlab chiqarish sust, xizmatlar cheklangan, aholi ehtiyoji chetda qolgan bo'lsa, bugun barcha sohada yangi nafas, yangi tashabbuslar yuzaga chiqmoqda, amaliyotga faol tatbiq etilmoqda. Yashirin imkoniyatlar yuzidan “harir pardalar” ko'tarildi. Viloyatda ko'plab yangi korxonalar va loyihalar ishga tushayotgani odamlarning tafakkuri, dunyoqarashi, hayotga munosabati ham yangilanayotganidan dalolat.

Darhaqiqat, bugungi kunda yurtimizda odamlar hayotga boshqacha qarayapti. Ularning ko'zlarida ishonch uyg'ongan. Endilikda fuqarolar o'zini tomoshabin deb bilmaydi: u jarayon ishtirokchisi, hatto unga ta'sir ko'rsatuvchi subyekt. Mahalliy Kengashlarda faollik oshdi, jamoatchilik nazorati amalda ta'minlanmoqda. Bu esa butun boshqaruv tizimini xalqqa yaqinlashtirdi, odamlarning davlatga ishonchi va munosabatini o'zgartirdi.

Toshkent viloyatida amalga oshirilayotgan ishlar, qurilayotgan inshootlar, ishga tushayotgan loyihalar ortida raqamlarigina emas, balki inson taqdiri o'zgarayotgani, mehnati qadri oshayotgani, hayoti farovonlashayotganini ko'rish mumkin.

Viloyat bugungi kunda “o'zini topa olgan hudud”ga aylandi. Hududning qulay geografik joylashuvi, keng turdagi qazilma boyliklari, salohiyatli inson resursidan unumli foydalanilmoqda. ➡4



30,5 MILLIARD DOLLARLIK SARMOYA VA SAVDO BITIMLARI IMZOLANDI

IV Toshkent xalqaro investitsiya forumi ko'tarinki ruhda, o'ta samarali va muvaffaqiyatli o'tdi. Uning doirasida umumiy qiymati 30,5 mlrd. AQSh dollarlik investitsiya va savdo bitimlari imzolangani buning yorqin dalilidir.

Brifing

Forum yakunlari bo'yicha tashkil etilgan brifingda ta'kidlanganidek, mazkur ko'rsatkich forumning to'rt yillik faoliyatidagi eng yuqori natija hisoblanadi.

Tadbirga joriy yilda jahonning 100 ga yaqin mamlakatlardan 3 mingga yaqin xorijiy mehmonlar, umumiy hisobda 7,5 mingdan ortiq delegatlar tashrif buyurdi. Tabiiyki, bu investorlarning mamlakatimiz iqtisodiyotiga bo'lgan qiziqishi tobora ortib, yangi O'zbekistonni munosib sarmoyaviy hamkor sifatida tanlayotganidan dalolat beradi.

Chindan ham, yurtimiz o'zining qulay ishbilarmonlik muhiti tufayli mintaqaning eng jozibali investitsiyaviy manzillaridan biriga aylanmoqda. O'z biznesini O'zbekiston bilan bog'lamoqchi bo'lgan taniqli kompaniyalar, yirik investorlar, moliyaviy hamkorlar safi yil sayin kengayib boryaptiki, bunda Toshkent xalqaro investitsiya forumi muhim muloqot maydoniga aylandi. Mazkur anjuman Markaziy Osiyodagi eng yirik investitsiya platformasi sifatida e'tirof etilayotganining boisi ham ana shunda.

O'zbekiston Prezidenti Mirziyoyev ikki yirik tadbir – forumning yalpi majlisi hamda Xorijiy investorlar kengashining uchinchi sessiyasida ishtirok etib, nutq so'zlagani uning nufuzini yanada oshirdi. Buni Toshkent shahrida jam bo'lgan jahonning yirik moliya institutlari, davlat idoralari, xalqaro investorlar va biznes vakillari alohida mamnuniat bilan ta'kidlamogda.

Bu yilgi forum yanada keng ko'lam va yangicha shaklda o'tkazildi. Xususan, 40 ga yaqin shu'ba yig'ilishlarida 150 dan ortiq taniqli spikerlar ishtirokida jahon iqtisodiyotidagi dolzarb masalalar muhokama qilindi.

Ik bor O'zbekiston kompaniyalarining loyihalari va qo'shma tashabbuslari namoyish etilayotgan ixtisoslashtirilgan milliy ko'rgazma tashkil qilingani forumning eng muhim voqeasi bo'ldi deyish mumkin. 12 ming kvadrat metr maydonni egallagan ko'rgazmada elektrotexnika, farmatsevtika, to'qimachilik, charm sanoati, qurilish materiallari, mashinasozlik, tog'-kon sanoati va metallurgiya, energetika, avtomobilsozlik, kimyo, oziq-ovqat sanoati, moliyaviy xizmatlar, IT, turizm va boshqa sohalarida xorijiy investorlar uchun istiqbolli loyiha takliflar taqdim etildi.

Bu mehmonlarda katta qiziqish uyg'otganini har kuni ko'rgazmaga 2 mingdan ziyod odamlar tashrif buyurgani, 500 dan ko'p “B2B” va “B2G” formatidagi uchrashuvlar o'tkazilgani misolida ham yaqqol ko'rish mumkin.

Bularning bari IV Toshkent xalqaro investitsiya forumi ishchan ruhda o'ta qizg'in o'tgani, istiqbolli hamkorlikka mustahkam poydevor bo'ldi deb aytishga asos bo'la oladi.

“Xalq so'zi”.

O'ZBEKISTON TAJRIBASI YUQORI BAHOLANDI

Jeneva shahrida bo'lib o'tayotgan Xalqaro mehnat konferensiyasining 113-sessiyasi doirasida 12-iyun – Butunjahon bolalar mehnatiga qarshi kurashish kuni munosabati bilan maxsus konferensiya tashkil etildi.

Xalqaro anjuman

Tadbirda Xalqaro mehnat konferensiyasida qatnashayotgan 187 ta davlat orasida qisqa vaqt mobaynida bolalar mehnati va majburiy mehnatga butunlay barham bergan mamlakat sifatida O'zbekiston tajribasi namoyish qilindi.

Unda Oliy Majlis Senati Raisi, Odam savdosiga qarshi kurashish va munosib mehnat masalalari bo'yicha milliy komissiya raisi Tanzila Norboyeva “Bolalar mehnatiga barham berishda O'zbekiston tajribasi” mavzuida ma'ruza qildi. U o'z so'zida O'zbekiston Prezidenti Shavkat Mirziyoyevning kuchli siyosiy irodasi hamda shaxsiy tashabbusi bilan ushbu illatga qarshi ko'rilyotgan qat'iy amaliy choralar o'zining ijobiy natijasini berayotganini ta'kidladi.

Milliy komissiya raisi mamlakatimizning bolalar mehnati va majburiy mehnatga nisbatan keskin pozitsiyasi hamda xalqaro hujjatlar, shu jumladan, Xalqaro mehnat tashkilotining asosiy konvensiyalari va 29-sonli Konvensiyaga Bayonnoma ratifikatsiya qilingani sohaga oid islohotlarning mustahkam huquqiy poydevori bo'lganini e'tirof etdi.

Yangi tahrirdagi Konstitutsiya va Mehnat kodeksi bolalar mehnatiga tamoman chek qo'yishga qaratilgani, har bir fuqaroning ijtimoiy himoyasini kafolatlash esa inson qadrlari yuksaltirishga qaratilgan davlat siyosatining markazidan joy olgani qayd etildi.

Konferensiya ishida O'zbekistonda Xalqaro mehnat tashkilotining tegishli konvensiyalarini ratifikatsiya qilish, milliy qonunchilikni xalqaro standartlar asosida takomillashtirish, bolalar mehnati va majburiy mehnat uchun javobgarlik choralarini kuchaytirish, institutsional asoslarni mustahkamlash borasida amalga oshirilayotgan ishlar yuqori baholandi.

Shuningdek, tadbirda Xalqaro mehnat tashkiloti, Xalqaro kasaba uyushmalari Konfederatsiyasi, Xalqaro ish beruvchilar Konfederatsiyasi, YUNISEF hamda Filippin, Marokash, Chili, Germaniya, Braziliya hukumati vakillari ma'ruza bilan ishtirok etdi. Ekspertlar bugungi kunda O'zbekiston tajribasi bolalar mehnati va majburiy mehnatga qarshi kurash olib borayotgan davlatlar uchun model bo'lib xizmat qilayotganini alohida e'tirof etishdi.

«FAOL INVESTOR – FAOL DAVLAT» MODELI SARI

So'nggi yillarda O'zbekiston xalqaro maydonda ochiq, pragmatik va barqaror taraqqiyotga asoslangan siyosat yuritish orqali jahon hamjamiyati e'tiborini tortmoqda. Bu jarayonda Toshkent xalqaro investitsiya forumi muhim o'rin tutadi.

Munosabat

To'rtinchi bor tashkil etilgan mazkur anjuman nafaqat iqtisodiy muloqot maydoni, balki O'zbekistonning yangi tashqi va ichki iqtisodiy strategik pozitsiyalarini teran anglatib beruvchi sammitga aylandi, desak, yangilishmaymiz.

O'tgan yili investitsiya hajmi 35 mlrd. dollarga, eksportimiz 27 mlrd. dollarga yetgani to'rt yildan buyon o'tkazib kelinyotgan Toshkent xalqaro investitsiya forumining amaliy natijasidir.

Yangi O'zbekistondagi islohotlar samarasi xalqaro reytinglarda ham o'zining munosib aksini topmoqda. “Iqtisodiy erkinlik indeksi”dagi o'rnimiz so'nggi besh yilda 48 pog'onaga ko'tarildi. Garvardning “Iqtisodiyot murakkabligi indeksi”dagi o'rnimiz 28 pog'onaga yaxshilandi. O'tgan oyda nufuzli “S&P” agentligi O'zbekistonning suveren reytingi prognozini “barqaror”dan “ijobiy”ga oshirdi.

Ushbu forumning markaziy g'oyasi sifatida investitsiya faqat iqtisodiy manba emas, balki tinchlik, inson qadri, barqaror rivojlanish va adolati jamiyat qurishning asosi ekanini alohida ta'kidlandi.

Mazkur yilda O'zbekiston 2030-yilgacha yalpi ichki mahsulotni 200 mlrd. dollarga yetkazish borasida ulkan maqsadlarni ko'zlagan. Bu nafaqat iqtisodiy raqamlar, balki O'zbekistonni yangi taraqqiyot bosqichiga olib chiqadigan dasturdur. Iqtisodiyotni modernizatsiya qilish, eksporti kengaytirish va xalqaro reytinglarda yuqori natijalar qayd etilishi so'nggi to'rt yilda o'tkazilgan forumlar ta'sirini ko'rsatib turibdi.

Qayd etish joizki, so'nggi yillarda mamlakatimizda investitsiya va biznes muhitini tubdan yaxshilash, bu yo'lga to'siqlarni bosqichma-bosqich bartaraf etish uchun qat'iy qadamlar tashlandi. Iqtisodiyotni erkinlashtirish, qulay investitsiya muhitini yaratish, tadbirkorlar uchun imkoniyatlarni har tomonlama kengaytirishga qaratilgan amaliy ishlar natijasida bugun yurtimizga kelgan har bir sarmoyador o'zini erkin va ishonchli his qilib, biznesini rivojlantirmoqda.

Prezidentimiz tomonidan belgilab berilgan to'rtta strategik yo'nalish – yangi O'zbekiston iqtisodiyotini shakllantiruvchi ustunlar. “Yashil” energetika sohasida amalga oshirilayotgan loyihalar, sohaga jalb qilingan milliardlab investitsiyalar va kelgusi besh yilda “yashil” energiya ulushini 54 foizga yetkazish rejalari O'zbekistonning global iqlim muammolariga jiddiy munosabatini ko'rsatadi. ➡3

XMT va O'zbekiston: TAMOIYILLAR UYG'UNLIGI E'TIROFI

Oliy Majlis Senati Raisi, Odam savdosiga qarshi kurashish va munosib mehnat masalalari bo'yicha milliy komissiya raisi Tanzila Norboyeva Jeneva shahrida o'tayotgan Xalqaro mehnat tashkiloti (XMT)ning 113-sessiyasi doirasida ushbu tashkilot Bosh direktori Jilber Ungbo bilan uchrashuv o'tkazdi.

Uchrashuv

Muloqot chog'ida O'zbekiston va XMT o'rtasidagi hamkorlik aloqalarining ayni holati hamda istiqbollari, shuningdek, amalga oshirilayotgan qator muhim tashabbuslar va loyihalar muhokama qilindi.

Jumladan, har yili atrof-muhit, mehnat huquqlari va boshqa yo'nalishlarda XMT bilan imzolalanayotgan

kelishuvlar izchil amalga oshirilayotgani qayd etildi. Bundan tashqari, “O'zbekiston – 2030” strategiyasi doirasida olib borilayotgan islohotlar XMTning ustuvor yo'nalishlari va tamoyillari bilan to'la uyg'un ekanini ta'kidlandi.

Shuningdek, uchrashuvda munosib mehnat bo'yicha 2021 – 2025-yillarga mo'ljallangan mamlakat dasturining amalga oshirilishi bo'yicha fikr almashildi.

“Xalq so'zi”.

YANGI TASHABBUSLARGA OCHIQLIK VA BARQAROR TARAQQIYOTGA INTILISH

Poytaxtimizda O'zbekistonning global sarmoyaviy muloqotning muhim ishtirokchisi sifatidagi maqomini mustahkamlagan keng ko'lamli tadbir – IV Toshkent xalqaro investitsiya forumi o'z ishini yakunladi. Tadbirda 100 ga yaqin mamlakatlardan davlat va hukumat hamda yirik transmilliy kompaniyalar rahbarlari, investorlar, nufuzli xalqaro moliya institutlari va biznes vakillari ishtirok etdi.

Dunyo nigohi

O'zbekiston Prezidenti Shavkat Mirziyoyev forumning yalpi majlisida so'zlagan nutqida “Keling, birgalikda shunday investitsiya muhitini yarataylikki, u daromad keltirish bilan birga inson qadrlari ulug'laydigan, uning hayotiy manfaatlarini ta'minlaydigan va jamiyat ravnaqiga xizmat qiladigan mustahkam poydevorga aylansin”, deya ta'kidladi.

Forum dasturidan global va mintaqaviy iqtisodiyot, sarmoyaviy hamkorlik, barqaror rivojlanish, raqamli transformatsiya va “yashil” o'sishning eng dolzarb muammolariga bag'ishlangan qator panel sessiyalar, davra suhbatlari va muhokamalar o'rin oldi. Muhokama mavzulari zamonaviy iqtisodiy kun tartibining ustuvor yo'nalishlarini o'zida aks ettirdi va biznes amaliyotchilari, tahlilchilar va ekspertlarda katta qiziqish uyg'otdi.

Anjuman O'zbekistonning sarmoyaviy salohiyatini namoyish etish uchun asosiy platformaga aylandi. Ishtirokchilar e'tiboriga energetika, infratuzilma, sanoat, qishloq xo'jaligi, turizm va AKT sohalarida amalga oshirilayotgan yangi loyihalar,

ishbilarmonlik muhitini yaxshilash va investorlar huquqlarini himoya qilishga qaratilgan islohotlar taqdim etildi.

Ishtirokchilar xalqaro ekspertlar ham hamkorlik o'rnatish, o'zaro tajriba almashish va strategik tashabbuslarni muhokama qilish uchun samarali maydon sifatida Toshkent xalqaro investitsiya forumining ahamiyati ortib borayotganini ta'kidlashdi.

Odil Reno-BASSO, Yevropa tiklanish va taraqqiyot banki prezidenti:

– Islohotlar va iqtisodiyotni liberallashtirish nuqtayi nazaridan O'zbekiston xususiy sarmoya kiritish imkoniyatlarini kengaytirishni davom ettirishi kerak. Xususiy lashtirish va me'yoriy-huquqiy bazani mustahkamlash borasida sezilarli yutuqlarga erishilgan bo'lsa-da, tadbirkorlik muhitini yaxshilash va



xususiy sektor o'sishini rag'batlantirish uchun hali ko'p ishlar qilinishi lozim.

Hozirgacha erishilgan natijalar juda quvonarli. Masalan, qayta tiklanadigan energetikaga katta miqdorda to'g'ridan-to'g'ri xorijiy investitsiyalar jalb qilindi, iqtisodiy faollik rag'batlantirildi.

So'nggi yillarda investitsiyalar darajasi barqaror o'sib bormoqda, O'zbekiston YTTB investitsiyalari hajmi bo'yicha yetakchi 5 davlat qatoriga kiradi. Ushbu ijobiy tendensiya kelgusi yillarda ham davom etishini kutamiz. ➡3

Zamonaviy elektr stansiyasi
bunyod etilmoqda

Poytaxtimizning Yunusobod tumanidagi 4-issiqlik markazi hududida yangi, zamonaviy gaz-porshenli elektr stansiyasi bunyod etilmoqda.



Xitoyning yirik kompaniyalari bilan hamkorlikda qad rostlayotgan mazkur inshootda barcha zarur qurilmalar yetkazilgan boʻlib, 52 nafar mahalliy, 30 nafar xorijiy mutaxassisdan iborat ishchi-guruhlar montaj ishlari olib borayotir.

Ahamiyatli, qurilma ishga tushgach yiliga 876 mln. kVt/soat elektr energiyasi ishlab chiqarilib, zamonaviy qurilmalar hisobiga 245 mln. kubometr tabiiy gaz tejalisiga erishiladi.

Ushbu qurilma orqali mamlakatimiz energotizimiga joriy yildan boshlab elektr va issiqlik energiyasini uzatish rejalashtirilgan.

“Made in Uzbekistan”
milliy mahsulotlar
koʻrgazmasi

10 – 12-iyun kunlari Boku shahrida Turkiya davlatlar oʻrtasidagi savdo va sarmoyaviy hamkorlik forumi doirasida “Made in Uzbekistan” milliy mahsulotlar koʻrgazmasi boʻlib oʻtdi.

“Made in Uzbekistan” stendida farmatsevtika sohasiga ixtisoslashtirilgan “Vida Verde Pharm”, “Uzgermed pharm”, “Samo”, “Dentafill plyus”, “Nobel Pharmanoat” korxonalari oʻz mahsulotlari hamda ishlanmalarini taqdim etdi. Yuqori sifatli dori vositalari va zamonaviy ishlanmalar koʻrgazma ishtirokchilari hamda xalqaro hamkorlar diqqatini tortdi.

Ushbu nufuzli tadbir turkiy davlatlar oʻrtasidagi iqtisodiy hamkorlik va oʻzaro aloqalarni yanada mustahkamlashga xizmat qilishi bilan ahamiyatlidir.

“Eng faol yosh ishchi-kash egasi” tanlovi gʻoliblari
aniqlandi

Oʻzbekiston kasaba uyushmalari harakatining 120-yilligi arafasida Toshkent arxitektura-qurilish universitetida maxsus tanlov tashkil etildi. Yaʼni tarmoq korxona va tashkilotlarida faoliyat yuritayotgan hamda mazkur yoʻnalishda taʼlim olayotgan yoshlar oʻrtasidagi ushbu tanlov “Eng faol yosh ishchi-kash egasi” deb nomlandi.

Bellashuvlar “Gʻisht terish – umumqurilish ishlari ustasi” va “Quruq qurilish va pardozlash ishlari ustasi” yoʻnalishlari boʻyicha nazariy hamda amaliy bosqichlarda oʻtkazildi. Respublika bosqichida mamlakatning 14 ta hududidan 28 nafar yosh mutaxassis qatnashib, ularning bilim va mahorati hakamlar tomonidan haqqoniy baholab borildi.

Gʻoliblar Oʻzbekiston transport, yoʻl va kapital qurilish, qurilish industriyasi xodimlari kasaba uyushmasi Respublika kengashi tomonidan diplom va qimmatbaho esdalik sovgʻalar bilan taqdirlandi.

“Xalq soʻzi”.

BOLA HUQUQLARINI
TAʼMINLASHGA BARCHA MASʼUL

Oliy Majlis Senatining Yoshlar, xotin-qizlar, madaniyat va sport masalalari qoʻmitasi “Bolalarni zoʻravonlikning barcha shakllaridan himoya qilish toʻgʻrisida”gi Qonun ijrosini nazorat qilishda deputatlarning oʻrni” mavzusiga bagʻishlangan seminar oʻtkazdi.

Seminar

Bundan koʻzlangan maqsad mahalliy Kengashlar deputatlarining soha boʻyicha qonunchilikdagi yangiliklar va oʻzgarishlar yuzasidan nazariy bilimlari, amaliy koʻnikmalarini oshirish hamda mazkur qonunning hududlarda samarali ijro etilishi ustidan deputatlik nazoratini olib borishdir.

Seminarida Oliy Majlisning Bola huquqlari boʻyicha vakili, masʼul tashkilotlar mutasaddilarining mavzuga doir maʼruzalari hamda senatorlar, ekspertlar, Yoshlar parlamenti aʼzolarining fikr-mulohazalari eshitildi.

Taʼkidlanganidek, hududlarda bolalarning huquqlari, erkinliklari va qonuniy manfaatlarini taʼminlashda mahalliy davlat hokimiyati organlarining bu boradagi faoliyati muhim ahamiyatga ega.

2024-yil noyabrda qabul qilingan va shu yilning 15-may kuni kuchga kirgan “Bolalarni zoʻravonlikning barcha shakllaridan himoya qilish toʻgʻrisida”gi Qonun bolalar huquqlari, erkinliklari va qonuniy manfaatlariga rioya etish hamda ularni hurmat qilishning huquqiy asoslarini takomillashtirish, bolalarga nisbatan zoʻravonlik holatlariga muvofiq munosabatda boʻlish va zoʻravonlik sodir etgan shaxslarga nisbatan javobgarlik muqarrarligini taʼminlashga xizmat qilayotgani qayd etildi.

“Oʻzbekiston Respublikasi Oliy Majlisining Bola huquqlari boʻyicha vakili (Bolalar ombudsmani) toʻgʻrisida”gi Qonunga koʻra esa Bola huquqlari boʻyicha vakilining Qoraqalpogʻiston Respublikasi, viloyatlar va Toshkent shahridagi vakillarini tayinlash belgilangan. Shu munosabat bilan

“Xalq soʻzi”.

Tadbir

AHOLINING ZAIF QATLAMLARI
IMKONIYATLARI KENGAYTIRILADI

Kecha Toshkent shahrida Yevropa komissiyasi tomonidan moliyalashtirilayotgan hamda Minority Rights Group Europe (MRGE), Fuqarolik tashabbuslarini qoʻllab-quvvatlash markazi va Oliy Majlis Senati bilan hamkorlikda amalga oshirilayotgan “Samarali va barqaror fuqarolik jamiyatini barpo etish orqali aholining zaif qatlamlari huquqlari va imkoniyatlarini kengaytirish” loyihasi doirasida yakuniy konferensiya boʻlib oʻtdi.

Konferensiyada Senatning Yoshlar, xotin-qizlar, madaniyat va sport masalalari qoʻmitasi aʼzosi Malika Qodirxonova, xalqaro va nodavlat notijorat tashkilotlari hamda ekspertlar hamjamiyati vakillari ishtirok etdi.

Tadbir davomida Oʻzbekistonda aholi zaif guruhlarining huquqlarini himoya qilish sohasida erishilgan yutuqlar, mavjud muammolar va tavsiyalar muhokama qilindi.

Anjuman doirasida aholi zaif guruhlarining huquqlarini himoya qilish, gender tenglik, shaxsning bir necha identifikatsiyasi kesishuvi hamda milliy madaniy markazlarning millatlararo totuvlikni mustahkamlashdagi roliga oid masalalarga alohida eʼtibor qaratildi.

Tadbir yakunida sessiyalarda ishlab chiqilgan taklif va tavsiyalar muhokama qilindi.

“Xalq soʻzi”.

Qoʻmitalar hafta ichida

MILLIY MAQSAD VA VAZIFALARNING
BAJARILISH HOLATI QANDAY?

Oliy Majlis Qonunchilik palatasi Fan, taʼlim, madaniyat, sport va yoshlar masalalari qoʻmitasining kengaytirilgan yigʻilishi boʻlib oʻtdi.

Unda Maktabgacha va maktab taʼlimi vazirligining “BMTning Barqaror rivojlanish maqsadlarini izchil amalga oshirish boʻyicha sohada tizimli ishlarni tashkil etish hamda 2030-yilgacha boʻlgan davrda barqaror rivojlanish sohasidagi milliy maqsad va vazifalarning bajarilishi borasida amalga oshirilayotgan ishlar toʻgʻrisida”gi axboroti eshitildi.

Vazirlik axborotiga koʻra maktabgacha va maktab taʼlimi tizimida 38 mingdan ortiq bogʻcha va 10 146 ta maktab faoliyat yuritmoqda. Soʻnggi 7 yilda maktabgacha va maktab taʼlimi uchun mablagʻ yetti karra oshirildi. Natijada maktablarda 1 millionga yaqin, bogʻchalarda 1,5 million yangi oʻrinlar yaratildi. 1 500 ta maktabda esa Prezident va ixtisoslashtirilgan maktablar taʼlim dasturi joriy qilindi.



2025/2026 oʻquv yilidan boshlab, qoʻshimcha 1 500 ta yangi baholash tizimi tatbiq etilib, ularning soni 3 mingga yetkaziladi.

Shuningdek, tarmoqlar talabi asosida 289 ta maktabda 10-sinf oʻquvchilariga 60 turdagi kasblarni oʻrgatish yoʻlga qoʻyilgan. 2024-yilda 132 nomdagi zamonaviy darsliklar yaratilgan boʻlsa, 5 – 7-sinfilar uchun xorijiy nashriyotlarning tabiiy va matematika fanlaridan darsliklari mahalliylashtirildi. 2025-yilning oʻtgan davrida xorijiy tajribani mahalliy lashtirish asnosida 15

nomda darslik va oʻquv metodik majmua yaratildi.

Taʼlim sohasidagi keng qamrovli ishlar natijasida nodavlat umumtaʼlim maktablari soni oʻtgan yildagiga nisbatan 72 taga oshib, 573 tadan 645 taga yetkazilgan. 2025-yilda esa ularning soni 700 taga yetkaziladi. Qolaversa, joriy yilgi ijtimoiy ishlab chiqarish dasturiga asosan 379 ta maktabda qurilish-taʼmirlash ishlari amalga oshirildi.

Axborotda keltirilganidek, bolalarni maktabgacha taʼlim bilan qamrab olish darajasini 77, 6 yoshli

bolalarni maktabga tayyorlov tizimi bilan qamrov darajasi esa 96 foizga yetkazilgan. Xalqaro tajribalar asosida taʼlim-tarbiya jarayonini tashkil etishda yagona meʼyorlarni belgilovchi “Ilk qadam” davlat dasturi ishlab chiqilgan. Ushbu dastur asosida 6 yoshli tayyorlov guruhlariga moʻljallangan variativ oʻquv dasturi yaratilib bogʻchalarga yetkazib berilgan.

Barcha davlat va 14 mingta oilaviy bogʻchalar byudjet mablagʻlari hisobidan zamonaviy oʻquv-metodik qoʻllanmalar va didaktik materiallar bilan taʼminlangan. 2025-yil yakuniga qadar qamrov 78 foizga, 6 yoshli bolalarni maktabga tayyorlov tizimi bilan qamrov darajasi 98 foizga yetkaziladi.

Mutasaddilarning aytishicha, joriy yil yanvar oyidan tajriba-sinov tariqasida 208 ta maktabgacha taʼlim tashkilotlarida inklyuziv taʼlim joriy qilingan. Ulardagi 252 ta inklyuziv guruhga 612 nafar nogironligi boʻlgan maktabgacha yoshdagi bolalar jalb etilgan.

Uzoq muddatli davolanishda boʻlgan bolalarga uzluksiz

taʼlim-tarbiya berish maqsadida “Zamin” xalqaro jamoat fondi koʻmagida “Mehrlil maktab” davlat taʼlim muassasasi tashkil etilgan. 2023-2024-yillarda 7 ta hududda uning filiallari ochilgan boʻlsa, 2025-yilda Surxondaryo va Xorazm viloyatlarida “Mehrlil maktab”ning filiallari yoʻlga qoʻyilishi rejalashtirilgan.

Shu bilan birga, oʻquvchilarga zarur bilim va koʻnikma berish maqsadida qator milliy hamda xalqaro loyihalar, dasturlar amalga oshirilmogda.

Muhokama davomida deputatlar sohada amalga oshirilayotgan keng koʻlamli ishlarni eʼtirof etib, 2030-yilgacha boʻlgan davrda barqaror rivojlanish sohasidagi milliy maqsadlar va vazifalar ijrosi boʻyicha nazarda tutilgan xarajatlarni oʻz vaqtida moliyalashtirish, mazkur yoʻnalishda belgilab olingan “Yoʻl xaritasi”ning ijrosini toʻliq taʼminlash choralarini koʻrish boʻyicha tegishli taklif va tavsiyalar berdi.

Yigʻilish yakunida kun tartibidagi masala yuzasidan qoʻmitaning tegishli qarori qabul qilindi.

“Xalq soʻzi”.

Oʻzbekistonda soʻnggi ikki yilda chet el kapitali ishtirokida 5,5 mingta yangi korxona tashkil etildi.

